



Bentiaraq Ottosen
Atassut

UKA 2024/18
25. September 2024

Uunga siunnersuut Kalaallit Nunaanni aningaasanik nuussinermi paasisutissat ilanngullugit nassiunneqartarnissaannik inatsisip allanngortinneqarnissaa pillugu inatsisissatut siunnersuut.

(Aningaasaqarnermut Akileraartarnermullu Naalakkersuisoq)

Pinerlunnernut aamma peqquserluutitigut aningaasanik nuussuiniartarnermi malunnarunnaarsaartitsineq inerteqqutaalluinnartuusoq ilisimalluarparput, pisariaqarlunnarporli aamma Kalaallit Nunaat tamatuminnga aamma sukannersumik inatsimmik sinaakkuteqartariaqartoq. Ullumikkut sumiikkaluaruttaluuniit passi aamma MitID atorlugu ammaasinnaavugut aningaasaliissuteqarniarutta, soorlu aningaaserivimmu assigisaanullu.

Aningaasat ingerlaartut eqqarsaatigalugit malunnarunnaarsaartitsilluni aningaasanik nuussuineq sukannersumik inatsisitigut sinaakkusersorneqarnissaa pingaaruteqartut ilagaat, assersuut ilisimalluarparput Kryptovaluta imaluuniit Krypto tassaammat kinaassutsimik isertuusamit pigineqartut aningaasat elektroniskiusut atorlugit pisiniarfik imaluuniit aningaasaliinnerit ingerlanneqartartut. Tamakkua eqqarsaatigalugit pinerlunnernut attuumassuteqarpata aningaasat malunnarunnaarsaartitsilluni nuussuinerlut atorneqarsinnaammata, tamakkua pinngitsoortinneqassappata sukateriffigineqartussaapput. Pissutigalugu Krypto navianartumik inissisimatitsisinnaavoq, kisianni isumaqarpunga taamaasiortoqassatillugu inuup nammineerluni aamma kiffaangissusaa qiviarnaqqaartariaqartoq.

Pinerlunnerit aamma peqquserlunnerit taamaattut pineqartillugit sukannersumik Politiit isertortumik paasinaasartuinut tunniunneqartarnissaat pisariaqarlunnarpoq, nalunngilarput maani partiit tamattaalluta pinerlunnernut aamma peqquserluutitut assigiingitsunik illersuisuungitsugut, taamaattumik tamattaalluta isumaqarpunga aaqiissoqarnissaa siunertariuartaqaripput.

Eqqaamaqquara inuup nammineerluni kiffaangissusaa pingaarnarpaajusoq, kiffaangissusiaaniaanarluta kiffaangissusiaasanngilagut. Soorunalimi pisariaqartilluinnakkatta ilagaat, uppersaammik takutitsisoqarpat soorlu Passi aamma MitID atorlugit iluatsiffiusinnaassasoq pinerlunnerit aamma peqquserlunnerit akiorniarnernit.

Pisussaaffilerneqarpugut akisussaassuseqarluta tamatta, taamatut pinerluttoqannginnissaa peqquserlullunilu aningaasanik malunnarunnaarsitsilluni nuussuisoqannginnissaa pillugu. Taamatullu pinerluttoqarsimatillugu inatsit sukangasooq atorneqartariaqarpoq, pissutigalugu aningaasat pineqarsinnaammata ikiarooruarnartuarnianut, aallaasinik assigisaanillu unioqqutitsilluni pisititsisarnikkut, tamakkualu akuersaarneqarsinnaanngitsut isumaqarpunga.

Una siunnersuut ataatsimiititaliami susassaqartumi suliareqqitassanngorlugu innersuupparput.